

L'Hockey desche ocajion per smaorèr la ladinità

En vender ai 24 de aost se à serà sù la seconda edizion del Torno Ladin Elite de hockey, con l Cortina che à levà l trofeo al ciel

va inant da la pruma plata

cèsa l titol.

Ben segur, sorafora l'aspet agonistich e competitiv, l zil del Torno Ladin l'è chel de smaorèr l sentiment de partegnuda ladin anter duc i jiadores e i engaissè de chest sport.

L'Union Generela di Ladins de la Dolomites, che da semper porta inant e chier de valorisèr la cultura e la tradizion ladina, no l'ha fat n pas endò canche ge è stat domanà de patroziner la scomenzadiva, maridan cuscita l projet; na bela oportunità donca, che ge dèsc l met a la squadres de se meter a confront, purampò no desmentian mai l fin prinzipèl: prateghèr hockey duc leé da la medema reijes ladines.

L torneo

La partidas de jita e de outa en dut è states 6, che da vender ai 10 de aost enschin en vender ai 24, à viventà l Stadie Scola de Cianacei, l'Olimpich de Cortina e l Pranives de Selva. L suzess finèl è jìt a l'Hafro Cortina jà na di dant, con un "en plein" de 4 ventes su 4 partidas jìdes: 19 l'è stat i gol realisè dai jiadores ampezege e demò 11 chi sopii, con Luca Burzacca mior portier del torneo.

L Gherdèina no à podù defener sie titol, ajache te la partida combatuda ai 20 de aost, l Cortina se à fat lèrga, venjan 3 a 1 e seran sù cuscita per chest an per desdita del HCG sia aventura tel Torno Ladin. L Hockey Club Gherdèina a cognù ge fèr front



I jiadores del Fascia e del Cortina ensema ai tecnics e a la autoritèdes.

a l'autra squadres con jiadores n muie joegn, ajache chi foresé ruarà a jìer tel team demò a la fin del meis.

Te l'ultima partida en vender ai 24 alò dal Stadie Scola de Dèlba anter Fascia Falcons e Hafro Cortina, la emozions perferides è states dalbon tropes. Con i ampezege en vantac a la fin del prum temp de gra al gol de Giovanni Toffoli, i fascegn à sobito dò parejà con l gol de Elias Thum. Ence Riccardo Lacedelli à volù dir la sia, trajan l dischet te la gabia avversaria e portan endodanef l Cortina en vantac. Trop donca l'è stat dezidù tel terz temp, olache l Fascia al scomenz era en vantac, de gra a doi gol de Soel David Costantin e Elias Thum, ma l Cortina palesan amò n'outa la gran capazitèdes de squadra, à portà a cèsa

la venta con l gol de Michael Angelo Zanatta e chel de Andrea Moser a un menut da la fin, con l tabelon di ponc che a la fin de la partida segnèa 4 a 3 apontin per i ampezege.

La premiazion

A la premiazion finèla l'era ence Milva Mussner, presidenta de l'Union Generela di Ladins de la Dolomites, che dessema a Fernando Brunel, president de l'Union di Ladins de Fascia, l'ha spenù doi paroles en cont del significat culturèl e identitèr de chesta scomenzadiva. Ence Luca Guglielmi, vize ombolt de Cianacei, à palesà sia sodesfazione per l'endrez del Torno Ladin Elite de hockey.

L Trofeo, che è stat enschin ades



L diretor sportif del Gherdèina Walter Ploner-Baldo ge à consegnà l trofeo Ladin-Elite al capitan de l'Hafro Cortina Federico Lacedelli.



A la premiazion à tout pèrt ence la presidenta de l'Union Generela Milva Mussner, dessema a Fernando Brunel, Luca Guglielmi e i raprezentanc di gropes de folclor

te la bacheca di venjidores de l'an passà, ge è stat belimpont consegnà dal diretor sportif de l'HC Gherdèina Walter Ploner-Baldo al capitan di Hafro Cortina Federico Lacedelli, che ensema a si compagne à palesà sie gran orgolie e sie esser stolc de esser stac bogn de portèr a cèsa l titol.

L'esser e l se sentir ladins l'è stat l fil condutor che à leà dut e duc. Fiduziousc che chest fil ne conduje envers l'edizion de l'an che vegn, e speran apontin che chest event dovente n apuntamento fis tel calènder de duc i engaissè de chest sport, per averjer cuscita i orizonc a n nef capitol de la tradizion, de la cultura e de la storia de la jent ladina.



Alison Prinoth L trofeo Ladin-Elite.



L capitan Federico Lacedelli con l trofeo Ladin te man.